

PKR dedah bukti terbaru, kembali desak SPRM siasat NFC
The Malaysian Insider
12 Januari , 2012

PETALING JAYA, 12 Jan — PKR hari ini mendedahkan bukti terbaru bagi mendesak Suruhanjaya Pencegahan Rasuah Malaysia (SPRM) menyiasat dakwaan mereka terdapatnya cubaan merasuah pegawai penyiasat daripada seorang individu dalam Pusat Fidlot Nasional (NFC) dengan menggunakan khidmat orang tengah.

Dalam pendedahan yang dibuat oleh Pengarah Strategi PKR, Rafizi Ramli (gambar) di ibu pejabat PKR di Petaling Jaya itu, dia mengemukakan emel salah seorang ahli Lembaga Penasihat Pencegahan Rasuah SPRM, yang menyatakan terdapatnya cubaan merasuah polis oleh individu berkenaan dengan menggunakan khidmat orang tengah.

“Beliau telah menghantar emel menyatakan terdapat penglibatan seseorang dalam cubaan merasuah pegawai penyiasat kes skandal NFC.

“Berdasarkan emel tersebut, SPRM seharusnya menyiasat perkara itu kerana kenyataan tersebut bukanlah kenyataan yang tidak berasas.

“Beliau adalah tokoh yang dihormati dan menduduki banyak jawatan penting dalam negara, selain ahli Lembaga Penasihat SPRM, beliau juga memegang jawatan di Petronas dan banyak lagi agensi kerajaan,” kata Rafizi.

Dalam emel — menurut Rafizi yang dihantar oleh pegawai berkenaan kepada satu kumpulan emel pada Sabtu 31 Disember, jam 10.40 pagi lalu — pegawai berkenaan menyatakan beliau ada berjumpa peguam yang mewakili NFC dan Pengerusi NFC sendiri.

Pegawai berkenaan dalam emelnya juga menyatakan, “Dia memberitahu kami mengenai kaki penipu ini, seorang bermulut manis yang berjaya meyakinkan pelanggannya yang tertekan untuk memberikan wang supaya dapat mempengaruhi polis supaya bersikap kurang kasar (dengan NFC) semasa soal siasat.

Dalam emelnya itu juga, pegawai tersebut menyatakan “sekarang ini SPRM boleh campur tangan untuk menyiasat, kalau tidak sebelum ini perkara ini adalah urusan polis”.

Berdasarkan kenyataan tersebut, Rafizi bertegas mendesak pihak SPRM untuk menyiasat NFC ekoran emel tersebut kerana pegawai berkenaan merupakan tokoh yang dihormati di negara ini.

“Beliau adalah tokoh yang disegani dan memegang jawatan penting dalam negara, keterangan peribadi yang dibuatnya itu harus dipandang serius oleh SPRM.

“Oleh itu, PKR akan membuat laporan ke pejabat SPRM Shah Alam hari ini agar siasatan boleh dijalankan segera,” tambahnya kerana laporan dan pendedahan yang dikemukakan pihaknya setakat ini tidak menunjukkan sebarang tindakan diambil oleh badan pencegah rasuah tersebut.

The Malaysian Insider

Hakcipta © 2012 The Malaysian Insider

Source: <http://www.themalaysianinsider.com/bahasa/article/pkr-dedah-bukti-terbaru-kembali-desak-sprm-siasat-nfc/>